



## **INSTRUCCIÓN .../2020, DA XERENCIA DO SERVIZO GALEGO DE SAÚDE, SOBRE MEDIDAS RELATIVAS AO GOCE DAS VACACIÓNS REGULAMENTARIAS DO ANO 2020 COMO CONSECUENCIA DO CORONAVIRUS SARS-CoV-2**

Mediante a Instrución 4/2020 e sucesivas desta xerencia estanse a dispoñer diversas medidas, de carácter excepcional, dirixidas a garantir a dispoñibilidade de profesionais para facer fronte á carga asistencial derivada do coronavirus SARS-CoV-2.

Entre as citadas medidas recóllese a facultade das direccións das áreas e entidades sanitarias de proceder á denegación, suspensión ou revogación das vacacións, licenzas e permisos regulamentarios do seu persoal; cuxo disfrute efectivo queda en todo caso subordinado á capacidade de resposta ás necesidades asistenciais derivadas da crise sanitaria en cadanseu ámbito (apartado cuarto da Instrución 4/2020). Así, chega a indicarse que as vacacións e licenzas que pola dita causa non puidesen ser disfrutadas no momento inicialmente previsto serán obxecto de goce posterior, mesmo fóra do ano natural.

Pola súa vez o Ministerio de Sanidade, na Orde SND/232/2020, do 15 de marzo (BOE núm. 68, do 15 de marzo) estableceu determinadas medidas especiais en materia de recursos humanos para reforzar o Sistema Nacional de Saúde, reafirmando as competencias das autoridades sanitarias autonómicas para adoptaren actuacións concretas en materia de permisos, licenzas e vacacións dos seus empregados públicos. Varias desas medidas foron desenvolvidas e implantadas de xeito específico no Sistema Público de Saúde de Galicia a través de novas instrucións desta mesma xerencia (nomeadamente, a 7/2020).

Á vista da evolución actual da pandemia resulta procedente, dunha banda, que o persoal cuxos permisos e vacacións ficasen eventualmente en suspenso por mor da crise sanitaria poida gozar deles dun xeito progresivo e gradual e, da outra, que se retomen os calendarios e procedementos de común aplicación nos centros no que atinxe ao disfrute das vacacións regulamentarias correspondentes a este ano 2020, máxime, habida conta de que o período ordinario de vacacións na meirande parte deles está xa moi próximo.

Con todo, a programación funcional que se leve a efecto con ese fin nas distintas xerencias e entidades deberá ter necesariamente en conta a evolución da crise sanitaria. Neste senso, en diversos informes especializados como o emitido polo Centro de Coordinación de Alertas e Emerxencias Sanitarias (CCAES) o 25 de abril de 2020, faise fincapé na necesidade de dispoñer dos recursos humanos e materiais suficientes para dar a axeitada resposta asistencial ante os posibles abrochos e novas ondas epidémicas que se agardan no último trimestre do ano, de xeito que o esforzo sanitario realizado ata agora se consolide e se garanta así mesmo, cara ao dito trimestre, a posibilidade de despreparar recursos adicionais operativos nun breve espazo de tempo.

Na mesma liña apunta o apartado sétimo da Orde SND/387/2020, do 3 de maio, que require das comunidades autónomas que garantan a suficiente dispoñibilidade de profesionais sanitarios, recomendando un número non inferior ao existente na entrada en vigor do Real decreto 476/2020, do 27 de marzo, e instando á súa reorganización de acordo coas prioridades desta fase de transición, de xeito que as estruturas sanitarias estean dotadas dos recursos necesarios en cada momento.

Así pois e coa finalidade de garantir uns criterios minimamente homoxéneos de asignación das vacacións en todos os centros, en función das circunstancias actuais derivadas da crise sanitaria, emítense as seguinte

## INSTRUCCIÓN

### **Primeira. Obxecto e ámbito de aplicación**

A presente instrución será de aplicación a todas as categorías de persoal estatutario, funcionario e laboral das áreas sanitarias do Sistema Público de Saúde de Galicia, tomando como referencia de xeito particular o disposto no Acordo de Concertación Social do ano 2001 (publicado no *Diario Oficial de Galicia* o 19 de marzo dese ano), coas soas especificacións e criterios que se conteñen nos apartados seguintes.

## **Segunda. Criterios particulares para garantir a dispoñibilidade de profesionais durante os períodos de vacacións**

- Ante a eventualidade dos posibles abrochos e novas ondas epidémicas do coronavirus SARS-CoV-2 no último trimestre do ano, o persoal gozará da totalidade das súas vacacións ou, cando menos, da meirande parte delas, no denominado período ordinario; isto é, entre os meses de xuño e setembro de 2020 (ou de xullo a setembro, naqueles centros nos que se teña cinguido este período ao devandito tramo).

De xeito que o disfrute efectivo de vacacións fóra dese período ordinario resultará excepcional e supeditado, en todo momento, á evolución da pandemia; de xeito particular para aqueles colectivos máis directamente vinculados coa asistencia daquela.

- Sen prexuízo do anterior e coa finalidade de garantir a permanencia no servizo dun número suficiente de persoal coa imprescindible experiencia, con carácter xeral, non poderá ausentarse por vacacións ao mesmo tempo máis dun terzo (33%) do persoal estable de cada especialidade ou categoría profesional do respectivo servizo ou unidade de atención hospitalaria, atención primaria ou PAC (ou agrupación de PACs, se for o caso); ou ben outra porcentaxe diferente que garanta a plena capacidade funcional do servizo/unidade.

- Naquelas categorías e especialidades que representen maiores dificultades de cobertura de substitucións, tratarase de favorecer a asignación de bloques de vacacións completos, ou o máis amplos posible, aos aspirantes das listas de selección temporal. Cabe establecer así, a título de exemplo, que un cuarto do persoal estable aproveite as súas vacacións en cada mes do período ordinario de xuño a setembro.

- Os días de vacacións pendentes, de ser o caso, distribuiranse no resto do ano (último trimestre) de acordo con criterios de rotación e proporcionalidade, co fin de garantir en todo momento a continuidade asistencial e sen prexuízo do disposto no apartado cuarto da Instrución 4/2020 desta xerencia.

- Os anteriores criterios son orientativos, susceptibles de modificarse de xeito motivado (nomeadamente naquelas unidades e colectivos con maior déficit de persoal) e compatibles

cos que, de ser o caso, se teñan aprobado coa mesma finalidade de asegurar a dispoñibilidade de efectivos durante a pandemia no ámbito de cadansúa xerencia/entidade. Uns e outros deberán cohonestarse coas garantías e prelacións legalmente establecidas en atención ás circunstancias subxectivas de determinados profesionais.

- Nos supostos nos que por mor da actual crise sanitaria non fosen aínda aprobados, ou quedasen sen efecto, os calendarios anuais de vacacións de cada xerencia/entidade, os prazos de tramitación das vacacións deberán axustarse de maneira que tanto os ditos calendarios como as resolucións que procedan sexan aprobados e emitidas, respectivamente, ao longo deste mes de maio.

### **Terceira. Vixencia destes criterios**

As especificacións e criterios contidos nesta instrución, relativos ás vacacións regulamentarias correspondentes ao ano 2020, aplicaranse durante todo este ano en tanto en canto persista a situación de crise sanitaria.

Santiago de Compostela, ... de maio de 2020

O xerente do Servizo Galego de Saúde

Antonio Fernández-Campa García-Bernardo